



塵談三錄 凡六十二條

兩湖沈儀著

西苑南城紀事

京師宮殿鈞天之居非人臣所到其離宮  
宏麗者惟西苑與南城李文達公賢彭文  
憲公時以內閣元臣被旨縱觀記之頗悉  
李記西苑云入門即臨大液池蒲葦盈水  
際如劍戟叢立芰荷翠潔清目可愛循池  
東岸北行榆柳森排草色鋪岸如茵花香  
襲人行百許步至椒園松檜蒼翠果樹分

羅中有圓殿金碧掩映四面豁敞南有小池金魚遊戲其中西有小亭臨水芳木匝之曰翫芳又北行至圓城自兩掖洞門而升上有古松三株枝幹槎牙形狀偃蹇如龍奮爪拿空突兀天末前有花樹數品香氣極清中有圓殿崑然高聳曰承光北望山峯嶙峋萃律俯瞰池波蕩漾澄澈而山水之間千姿萬態莫不呈奇獻秀于几憲之前西有長橋跨池下過石橋而北山曰萬歲怪石參差為門三自東西而入有殿倚山左右立石為峯以次對峙四圍皆石巖巖齧齧

蘚封蔓絡佳木異草上嫵旁綴樛葛蒼翳兩掖壘石為嶝崎嶇轉折而上岩洞非一山畔並列三殿中曰仁智左曰介福右曰延和至其頂有殿當中棟宇宏偉簷楹翬飛高挿于層霄之上殿內清虛寒氣逼人雖盛夏亭午暑氣不到殊覺神觀蕭爽與人境隔異曰廣寒左右四亭在各峯之頂曰方壺瀛洲玉虹金露中可跂而息前崖有壁夾道而入壁間四孔以縱游覽宮闕崢嶸風景佳麗宛如圖畫下過石橋轉峯而北有殿臨池曰凝和二亭臨水曰擁翠飛香北至

良隅見池之原云是西山玉泉逶迤而來流入  
宮墻分派之池西至乾隅有殿用草曰大素殿  
后草亭登松以梅于上曰歲寒門左有軒臨水  
曰遠趣軒前草亭曰會景循池西岸南行有屋  
數連池水通焉以育禽鳥有亭臨水曰映輝又  
南行數弓許有殿臨池曰迎翠有亭臨水曰澄  
波東望山峯倒蘸于太液波光之中黛色嵐光  
可掬可挹烟靄雲濤朝暮萬狀又西南有小山  
子遠望鬱然日光橫照紫翠萬重至則有殿倚  
山山下有洞洞上石岩橫列密孔泉出迸流而  
下曰水簾其淙散激射飛薄濺灑最為可玩水  
聲泠泠然潛入石池龍昂其首口中瀆出復潛  
遶殿前為流觴曲水左右危石盤折為迳山畔  
有殿翼然至其頂一室正中四面簾櫳欄檻之  
外岳峯回互茂樹環擁異花瑤草莫可名狀下  
轉山前一殿深靜高爽殿前石橋隱若虹起極  
其精巧左右有沼沼中有臺臺外古木叢高百  
鳥翔集鳴聲上下至于南臺林木陰森過橋而  
南有殿面水曰昭和門外有亭臨岸沙鷗水禽  
如在鏡中游覽至此而止彭記南城云東為蒼

龍門南為丹鳳門中為龍德殿左右二殿曰崇仁廣智殿之背有橋皆白石雕水族于上南北有飛虹戴鰲二牌坊東西有天光雲影二亭又北疊石為山曰秀岩山上有圓殿曰乾運東西二亭曰凌雲御風山后為佳麗門又為永明殿又為圓殿引流繞之曰環碧移植花木青翠蔚然夫自今觀之誠宏偉壯麗考之甘泉上林華清艮岳太不侔矣謂匪

祖宗儉德哉

本朝宰輔

李西涯閣老云國家置文淵閣預閣事者迄今三十餘人此語在弘治戊午由前考之其人則解學士縉胡文穆公廣黃文簡公淮胡祭酒儼金文靖公幼孜楊文貞公士奇楊文敏公榮楊文定公溥陳尚書山張尚書瑛苗學士秉高文毅公穀馬學士愉曹文襄公彝張文僖公益陳少保循王少保文王文通公一寧蕭官師鉉江尚書淵商文毅公輅彭文憲公時徐武功有貞李文達公賢薛文清公瑄許學士彬呂文懿公原岳脩撰正陳莊靖公文萬文康公安劉文穆

公吉劉文和公珥劉文安公定之尹尚書直彭  
文思公華徐文靖公溥劉少師健立文莊公濬  
謝文正公遷若又繼是以后則焦少師芳王少  
傳鏊劉冢宰字曹司馬元揚少師廷和梁少師  
儲靳文僖公貴劉官保忠楊少師一清費少師  
宏石少保珪蔣少保冕毛少保紀賈少保詠桂  
少傳萼張少師孚敬方少保獻夫顧尚書鼎臣  
李少保時其止司誥勅而未參大政者吳文定  
公寬劉文定公春李宗伯遜學吳尚書一鵬也  
嗚呼天下之治亂係宰相觀其人其世可知也

科目得宰輔

國朝取士以進士為重而進士科目尤以得宰  
相為重洪武中罷中書省永樂初建內閣雖不  
與之以位而與之以權實宰輔也自設科以來  
每榜多或至二三人有一榜全無者惟建文庚  
辰則四人胡文穆公廣揚文敏公榮揚文定公  
溥金文靖公幼孜也永樂丙申亦四人陳學士  
循張學士益高文毅公較許學士彬也正統戊  
辰則五人彭文憲公時岳蒙泉正萬文康公安  
劉文穆公吉劉文和公珥也景泰甲戌亦四人

徐文靖公溥立文莊公濬彭文思公華尹文和  
公直也成化丁未則六人費鉛山宏劉文定公  
春蔣桂林冕李宗伯遜學毛東萊紀石藁城瑤  
也

### 狀元宰相

狀元宰相古今所難得我

朝以大魁而入內閣參預機務者八人胡文穆  
公廣陳少保循馬學士愉曹文襄公孫商文毅  
公輅彭文憲公時謝少傅遷費少師宏其止司  
制詔而未參大政則吳文定公寬也

### 洪武永樂儲材

我朝祖宗以來皆于館閣儲養賢才以備任使  
洪武癸丑命編脩張唯等十人進文華堂肄業  
詔宋濂為之師听政之暇時至堂中親評優劣  
且命光祿給酒饌每食

皇太子親王送為之主冬夏給衣賜白金鞍馬  
惜十人名姓無所于考永樂甲申亦命學士解  
縉選脩撰曾棨編脩周述周孟簡庶吉士楊相  
劉子欽彭汝器王英王直余昇章敬王訓柴廣  
敬王道熊直陳敬宗沈昇洪順章朴余學夔羅

汝敬盧翰湯流李時勉段民倪惟哲素添祿吾  
紳楊勉并周忱二十九人進學文淵閣司禮監  
給筆札光祿寺供飲饌分鈔以市膏燭賜第以  
為居止亦云厚矣后来成就若曾學士之博洽  
文章王文安之清才雅操王文端之學行純古  
陳祭酒之師範方嚴李忠文之節義慷慨周文  
襄之才優經國固其傑然者也至于張侍郎敬  
羅侍郎汝敬段侍郎民吾侍郎紳亦表表在人  
耳目后此其無及也已

洪武進士題名之缺

國朝進士登科題名永樂以來無庸言矣獨其  
洪武間者甚多脫誤雖楊文貞公士奇王文端  
公直陳少保循作題名記亦言人人殊三公久  
在館閣而迄無定論此葉文莊公盛所以謂登  
科一事即洪武中已無有能悉者然則不能無  
待于今日之諸君子也予觀今洪武三十一年  
其間題名止存四科餘皆缺焉莫考竟不知凡  
幾度設科取士然中間名公士夫姓名科第間  
有雜見于其他傳記者亦可得而知其一二也  
嘗聞洪武乙丑取進士四百七十有二人是年

練安一甲第二名黃子澄一甲第三名則乙丑  
開科矣洪武丁丑尹昌隆一甲第二名而吾鄉  
王洪侍講亦登是榜則丁丑亦開科矣二科題  
名不一見又有許觀張顯宗二狀元亦不知何  
科賜第蓋洪武定制雖以子午卯酉鄉舉辰戌  
丑未會試然朝廷或有故則停止亦有不拘辰  
戌丑未而會試者故難臆度也內府秘閣雖藏  
有籍錄然外廷何由而仰窺有志于好古者其  
寧不為之永嘆

本朝門第之盛

本朝論門第之盛父子為尚書者九家何冢宰  
文淵暨司寇喬新耿司寇九疇暨冢宰裕王家  
宰文暨宗伯宗彝施司寇禮暨宗伯淳倪宗伯  
讓冢暨宰岳白司馬圭暨宗伯鉞王家宰恕暨  
司徒承裕許冢宰進暨司徒誥冢宰讚林家宰  
瀚與司空廷搆也又其次則楊宗伯守陳與冢  
宰<sub>守</sub>陟凡第解元謝少傳遷與侍郎丕父子解元  
倫宮諭文叙與祭酒以訓父子會元黃檢討壽  
生與御史深行人乾亨憲副如金四世解元皆  
士林傳之以為嘉話云

本朝政事文學之臣

政事文學鮮能兼之昔人謂有政事而無文學  
不過為俗吏我

朝光岳氣完文治極盛翰林宗正后先挺出不  
暇枚舉其有法理之臣而濟以文章者英憲以  
來若尚書彭惠安公韶尚書何公喬新侍郎葉  
文莊公盛大理夏公時正給事張公寧孝武以  
來若尚書林公俊尚書楊公廉宗伯邵公寶都  
憲王公雲鳳儀部楊公循吉憲副李公夢陽司  
寇唐公龍司馬王公廷相皆郁乎大制作炳然  
于宇宙之間碑板所刻卷帙所載固已家傳而  
人誦之者也

名臣無謚

節以一惠朝廷之盛典也我國家文臣有謚始  
于

太宗之朝自是以來名公碩輔多膺賁終之典  
然亦有不預者姑以宣德以后論之如左憲顧  
公佐司寇軒公輓二公者名節勲猷炳然在人  
耳目而未獲易名意者臺閣之上懷生前忌克  
之私當與而不與又或有徇死者子孫之請又

不當與而與之廟堂之上當持大公至正之心亦厲世扶教之大端也

雲南交趾奇功

帝王之興開拓疆土削平僭亂雖賴爪牙之士宣力于四方然亦有天授非人力可及者我太祖命西平侯沐英取雲南師次曲靖扼險莫前忽大霧四塞英麾軍衝霧及白石江而止比霧霽賊大驚以為神兵飛至乘勝遂取雲南

太宗命新城侯張輔取安南師過清化晴久水涸賊衆先遁我軍莫渡俄而大雨數尺千艘畢進遂俘逆主郡縣其地此二事書之史冊光昭千古蓋與睢水之大風潭沱之冰合不多讓也

南京功臣祠墓

南京太平門有堤樹木森整遠望如畫左則玄武湖澄波萬頃右則鍾山蒼翠翁鬱三法司在湖之滸去此里餘漸就空曠洪武初開國元勳多賜塋其地然祠宇之脩置塋域之整飾惟中山王一家而已其餘則穹碑尚在石獸成行而冢木不存莖嘗無所殊為寥落甚則斷碑荒草于夕陽之間且鞠為畦圃併遺跡而亡之矣嗚

呼功載旂常名存太室清廟侑享之人而百五十年已湮沒如是彼金陵山水佳麗道室佛廬金碧輝映此顧蕪穢不治則領留務賤太常司獻納者不得不任其咎

本朝漕運名臣

本朝漕運之功談者以陳恭襄為首然詳觀載籍疏濬漕渠有尚書宋公禮區畫漕法有尚書黃公福經理般兌有尚書周公忱持衆美效之君不獨一元戎力而已

本朝治黃河能臣

入我朝黃河為漕渠之害所及知者凡三景泰間決于沙灣成化間決于金龍口弘治間決于張秋致底平之績者徐武功伯有貞白康敏公昂劉忠宣公大夏其疏濬之方障塞之法武功事見治水紀功碑康敏事見本傳并符離河記忠宣事見安平鎮減水壩記斑斑可考也

正統壬戌榜得人

我朝進士榜士夫相傳以為正統壬戌得人最多蓋有尚書十人姚文敏公夔王司空復王恭毅公繁項襄毅公忠張司寇瑄翁司徒世資張

宗伯文質白恭敬公圭薛司馬遠程襄毅公信  
右都二人韓公雍李公實僉都一人李公侃皆  
人望也然天順甲申亦與之頡頏自今觀之張  
簡肅公敷華倪文毅公岳謝文肅公鐸傅文穆  
公瀚王司徒軾劉忠宣公大夏戴恭簡公珊樊  
司寇瑩皆挺出其間其餘亦多賢豪固科目之  
光也嗚呼盛哉

素尚寶知人

素忠徹尚寶大常廷玉子也相術名天下廷玉  
能先識

太宗于潜却用是貴顯于時其道入貴賤禍福  
多奇中宣德中四明陸司寇愉方授主事往領  
牙牌忠徹以帑裘一牌授之既出展視之其文  
則刑部尚書也亟返以告公大笑曰非誤異曰  
當懸此耳后果然人益神其術云

王主事知天文

戕方王主事知天文之學劉東山爲司馬器重  
之壬戌春闈時南士數人才名籍甚衆謂必得  
倫魁王曰今歲文星所臨之地秦得其七楚得  
其三南士不與也已而魯鐸魁會試康海魁廷

試卒如其語云

史都憲知天文

右都御史餘姚史公琳正德初佐院事公明象緯之術時營惑犯執法公嘆曰必有以當之者不久左憲戴公珊薨于位然熒惑猶未退舍已而公亦下世

鄭大常在翰林夢

鄭大常瑤夫初及第與庶吉士楊瑛輩讀書翰林一夕夢人謂汝輩有一人食肉拾捌觔者也鄭不知所謂詰旦以問典教翰長先生荅曰尚早鄭猶未喻或告以今制閣老光祿日給肉十八觔始慚悔失言后三十年同年諸翰林皆歿公亦下世存者或出泣部事惟洛陽劉公健位少師尚書太學士領經筵揔國史參廟謨爲一朝元臣卒符其言

抗城戊子科舉人夢

人之富貴窮達有一定之數確不可移家君以成化戊子領鄉薦時舉子七人將同謁憲副楊公瑄公前一夕夢神人告以七舉子其一位尚書次日語衆且致期勉意然竟莫知爲誰后三

十餘年其四人者皆不通顯以沒惟家君以京兆尹刑部亞卿洪公鍾以右都御史涖南臺張公本以副都御史撫江西居無何家君與張皆謝政惟洪迂司寇躋一品卒應是言

### 謝御史奇夢

國朝重御史之選凡初入臺稱試御史必歷半歲考稱上奏而后實授此定制也家君尹應天時江西謝御史琛方理刑南臺一夕夢家君坐堂上涖試之既覺以語諸同寅申謂家君資望相近迂擢客或有之或問記題目云何謝曰彷彿有堯舜字或云茲考刑名行移非經書然堯舜舅甥意者婚媾律乎申闕然而罷不半歲家君擢少司寇以缺官攝印南臺謝當考試果問以律條婚姻事既具奏其僚長引謝為道其事申為憮然乃知富貴功名皆前定也

### 袁長史夢

袁宗臯初舉進士授

興府長史一夕夢在東閣與李西涯學士遜座席每舉以為人言初亦未必其何如也后三十年

今上自潛邸入正大統公以從龍舊恩入預宥  
密累擢禮部尚書文淵閣大學士卒符其夢

鄔駙馬對句

駙馬鄔公景和京師人嘉靖初尚永福公主選  
時例教養于禮曹毛三江宗伯方視篆嘗課以  
對聯句御溝水泮聞流水鄔即應聲云金屋春  
殘見落花方暮歲公主下世蓋其識云

楊玉指揮女

正德中錦衣指揮楊玉附逆瑾勢害人瑾敗玉  
伏誅家口沒入為奴有愛妾携少女匿民間得  
免此女長甚美麗妾鑒前禍誓不婚京師權貴  
家李白洲都憲蔭于納之后寧庶人干紀李坐  
寧黨被法此女入浣衣局噫有數焉無所逃也  
已

張統尚書名節

我

太祖皇帝知人之鑒明並日月任人之當不爽  
權衡初富平張公統舉良賢至京高廟策為第  
一累擢雲南左布政使時雲南初入戢方凡城  
池兵馬統轄官守錢穀賦稅皆公所定遠夷安

之九載課最復為天下第一召拜吏部尚書在任克盡厥職迨

文廟靖難師至金川門公朝服再拜自盡于后堂其經國之畧許國之忠皆副聖見宋學士濂稱

高皇為獨稟全智此之謂乎

### 張顯宗狀元

水東日記載練子寧脫犁賦張顯宗題跋且云顯宗洪武中狀元

高皇夢萬絲墜地覺而賜第后任祭酒建文中

徃江西起義兵不知所終予庚寅至南雍見大學祭酒司業題名碑有顯宗名刻曰洪武中授脩撰后任國子祭酒大常卿卒其為大常不知在何時若永樂中則日記所云誤矣

### 王良伏節

胡文穆公廣初名靖建文庚辰科狀元也初讀卷時翰林擬吉水王良為首選

當宁覽之而易以胡故良止為榜眼后

文廟靖難師起至良家居不食而伏節死之廣被知遇入內閣荐登台輔雖有王魏之功而罪

過之矣知人惟帝其難諒哉

解學士知人

大宗皇帝出片紙書近臣十八名命大學士解  
搢抨之搢于蹇義曰其資重厚而中無定見夏  
元吉曰有德有量而不遠小人黃福曰秉心易  
直確有執守宋禮曰慙直而苛人怨不恤陳瑛  
曰刻于用法好惡頗端陳洽曰流通警敏亦不  
失正鄭賜曰可為君子頗短于才劉儁曰雖有  
才幹不知顧義李至剛曰誕而附勢雖才不端方賓  
曰簿書之才馭僮之心評之美者福為首瑛洽

次之評之惡者賓至剛為首儁次之自今考之  
蹇夏黃之勲業無庸于言禮有區畫漕河功終  
三部尚書洽死交趾終兵部尚書瑛終刑部尚  
書賜終禮部尚書至剛以罪斥終知府賓以兵  
部尚書獲罪自盡儁以兵部尚書死交趾之難  
世以縉為名言此皆國初人物故特紀其大畧

三楊相業

我朝相業以三楊為首然亦賴  
朝廷委遇而責成之正統初  
英宗以幼君臨御

張太后在上，有擁佑之功。凡事專任三楊百司，奏事必命中使諮議，然後裁決。中官王振一日以事至閣，楊少師士奇有所擬議，振輒可否其間。公憤懣而歸，三日不出。

太后遣使來問楊少師，未語其故。

太后震怒，詔鞭振，遣人押至閣中謝罪，且戒之曰：「再尔必殺，無赦。」用是數年朝綱整飾，海內又安。其後

太后賓天，三楊亦先后下世。振始弄權天下，遂多事矣。

### 于少保謝恩表

于肅愍公謙，不特中興勲業，而文詞筆札亦精絕。不苟嘗聞成化間脩英廟實錄，商文毅公當摠裁，謂鄭編脩環曰：「少保一代偉人，傳中文辭若字義，欠當第須易之，庶可傳遠。」既而鄭檢公在彰義門營中謝，加少保表有一字未安，因相與商確，然而頻易數字，又不如彼之猶為穩妥。遂仍其舊，乃皆嘆服，不可及。蓋天下奇才也。

### 魏文靖陳士賢直道

魏文靖公驥，以直道自持，不苟徇俗。正統初任

吏部侍郎時中官王振怙寵而驕每出則雖部  
堂尊官亦歛輿迴避魏一日相遇于崇文門不  
為避王啣之譖于內中為公危之忽一日  
上御便殿召吏部既至問孰為侍郎驥且訊以  
近日曾有何事公慷慨言其故且曰臣不材備  
位六卿臣不足惜朝廷名器可惜耳溫旨慰之  
曰尔所言者是好官好官又布政使陳公選道  
學名流成化中任河南按察使持憲公廉不畏  
強禦時中官汪直司西廠詞事能立中人禍直  
往河南勾當公事藩臬悚息郊迎公不為禮俟  
其至盛服自公署中道而入直不能堪詰責之  
公即密疏其專擅罪疏入留中逮直歸  
上問河南好官為誰直以選對上以疏示之二  
公風節頗相似至于所以培植愛護之則  
祖宗之恩至矣

### 楊儀二尚書

姑蘇楊公翥端方靖重與楊東里公為布衣交  
用薦為翰林檢討歷侍講高密儀公銘豪爽超  
邁用厥考宗伯公智侍宣廟講讀恩亦為編脩  
歷侍講后皆擢邨王府長史迨

景皇帝踐祚被遇殊寵楊位宗伯儀位司馬壽考令終夫方其爲侍講也豈虞其補府僚也及其爲長史也豈望其至六卿也功名富貴信不可參以人謀也乎哉要之二公亦自足以承之固非倖致矣

### 彭司寇風槩

彭司寇詔自在卽署卽有材名時外戚周氏言民家占其田土

憲廟命公往訊公意謂未有以平民而敢侵貴室者悉以田土還之周啣之言于上逮繫詔獄時有季御史琮亦以同事被收每就鞠公輒昌言曰差失皆小人御史無預如此者再三久之泣詔獄者曰尔持正如此乃君子吾輩今爲小人耳遂爲直其事于朝得還任乃知天理在人心未嘗泯滅耳

### 二楊閣老薦人

宣德中魯穆爲福建僉事獨持風采不畏疆禦楊文敏公家人有犯亦不少貸文敏薦之爲僉都御史正統初范理爲江陵知縣楊文定公之子上京師沿途官司供奉甚恭理獨不爲禮文

定薦之知德安府乃知二公以國家為念而不計其私有古大臣風視世之得志乘時而借其喜以市恩鼓其怒以張勢者何如也

### 張莊簡恬淡

張莊簡公悅以僉憲提學浙江浙中學政以公為稱首其副憲四川時萬文康公方當國眉州人也部使者至境必敬謁其家公按部至眉謁廟畢州守以請弗應命輿而歸坐公署又請公徐曰知州何出身居官以何為先答以晚生僥倖進士願請教公曰要在心靜州守悚愧而止卒不一造文康門也

### 王尚文給事

王給事中徽在成化間有諫諍名坐是見斥時巨璫牛玉以大婚受賄敗公上疏併劾內閣以為牛玉之罪固所當誅而內閣大臣不能無罪其始不言者是黨牛玉也其后終不言者恐牛玉之后復有如牛玉者出而禍已也數語切中時弊談者至今尚之

### 張方洲給事

張方洲寧初給事禮科最為

英廟所重嘗奉使朝鮮其國之館伴悉以文人爲之每方洲執筆有作則其人從而呻吟哦咏逆揣其旨然亦間有偶合者蓋欲以是窘公也既而公登漢江樓排律詩其中有溪流殘白春前雪柳折新篁夜半風之句遂相顧駭愕自此不敢措一辭其國王梓其所作爲皇華錄以進始深服公之能云

錢文肅公典文衡

翰林官以典文衡爲美事然主考兩京主考會試同考會試鮮能兼得雖間有之然亦竒矣惟

錢文肅公習禮在翰林三十年爲會試同考主考兩京主考者各二本朝來一人而已

姚文敏公

姚文敏公夔亦近時名臣其爲宗伯時適

慈懿大后上仙內旨不欲以之合塋裕陵配享大廟公時秉筆奏牘謂山陵宗廟聖孝所先倫典綱常國家攸重慈懿之塋或違典禮在庭百辟將有言之宗室親藩將有言之天下后世將有言之能保將來無撓禮而改正之者乎引經執禮詞情懇切伏闕跪請

憲廟卒從公議當時雖賴內閣臺諫高之維持然公之力亦多也

### 陸克深方伯

陸方伯淵之初為翰林庶吉士閣老陳公文卒請謚公即上疏謂文庸材當與惡謚坐是出為兵部主事后擢知叙州以丰裁自持所事毀淫祠崇古名賢祠祀作吊黃亭以山谷嘗貶于斯也又作懷葛樓自書門對一聯云文武全才三代以前人物君臣大義百世之下典刑后終河南左布政使

### 張式之都憲

四明張僉都楷詩詞流麗有和唐音諸集不特海內稱誦而朝鮮日本亦賀其本以歸自官六察以至位中丞頗著勞勩而征閩之功尤偉惜見忌于時不克大用以沒人有書其家對聯云一着戎衣頗有功于閩浙三持憲節應無愧于乾坤公誠足以當之也

### 王襄敏材畧

王越世昌起家御史歷都憲司馬以靖虜功進封威寧伯雖尚推諫而文事武備皆有可觀世

間惟有征夫若天下無如邊塞寒髮為胡笳吹  
作雪心因兵火煉成丹其行邊詩也久之言官  
劾其生事開邊竟褫爵家居后起廢為西陝總  
制卒于邊西涯李公謂其姿表奇邁議論英發  
其于邊徼險易膚情真偽將士強弱勞逸皆在  
曾臆出奇取捷謀定后發莫測所向顛倒才智  
自為操縱而人人欣動樂為之用可謂得其實  
矣

### 寇都憲

寇都憲深天順中視院篆剛悻自用馭其屬甚

嚴一日歷事監生考動命題曰道盛德至同列  
駭然莫敢啓蓋韓公雍時為僉院從容請曰題  
難作若加一善字庶易成文公欣然從之人謂  
韓公善進言且有裨國體也

### 楊承芳都憲送行文

楊都憲繼宗風節材望標表天下方其為大守  
考績入京張芳洲贈以文謂公有今人所無者  
三古人所少者二剛直常持之以委易廉明常  
持之以含容勇敢常持之以寬靜而不速于成  
今之為即如其所施有如其所存者乎楊伯起

以清白著聞猶有可卻之金公治郡久始終無一足敢暮夜及門者蘇子卿以死為事史外猶有餘書公抵官以來遽遣妻孥歸養蕭然獨處齋閣此尤非夙昔之所見也非公不足以當之褒不過溢矣

### 劉忠宣善處事

弘治間河決張秋漕渠不通詔太監李公興都御史劉公大夏平江伯陳公銳往治之劉有幹局且公忠体國而陳用知數每事構諂李初不察而听之自是有所宴集多

不拉劉劉公處之不疑不速而往乘間為白其誣李密詞之其謀悉露始詣劉愧謝痛絕不欲與俱劉復温言和解且謂三人同功一体不宜異同宴會無陳劉輒不赴李不得已為之釋然卒底成功人無疵議所謂大臣之度劉公有焉他人值此鮮不激之而敗事者

### 劉忠宣得君

孝宗皇帝晚年親斷大獄日與大臣元老相接恩禮周浹劉司馬大夏一日對便殿以三營軍士多被占役勇士投充大濫各營草場侵欺隱

沒為言當宁首肯久之且諭以勿形奏疏蓋恐  
權貴中傷之方將有所釐正而龍馭不久上賓  
矣正德中劉有謫戍之禍蓋媒孽于此云

林見素骨鯁

林見素司寇自即署即以直聲名天下暨司憲  
滇廣中丞南臺巡視江右風采愈峻已而謝病  
歸正德中川陝盜起命公提督追寇平仍即歸  
卧嘉靖初朝廷訪落召為司寇不以家累隨居  
西朝房淡如也歲餘戶部羅洪載主事監倉通  
州坐擅奪軍戕命公鞠已而有旨改付錦衣詔  
獄公執不從封還內降用是忤旨不久謝政去  
侃侃太節始終不虧真金德元老哉

西涯篁墩舉神童

李西涯程篁墩少小時俱以神童被薦

英廟親試之對句曰螭鱗一身鱗甲程即應聲  
曰鳳凰遍躰文章上加稱賞時李尚伏地徐對  
曰蛛蜘滿腹絲綸上遂大異之曰是見他日作  
宰相耶俱賜寶鑑而出后李出入館閣四十年  
卒如聖語

弘治嘉靖中南京廉官

弘治中常山樊公瑩為南京刑部尚書室雞張公撫為侍郎二公清白儉素門館蕭然京師有樊破靴青菜張之名嘉靖初新泰崔公文奎南京工部尚書儀真黃公瓚為兵部侍郎其節操相似昔人謂居官廉雖大臣亦貧此語信然清風凜凜可庶頑而立懦矣

### 錢與謙謁西涯

錢與謙脩撰初會試京師謁西涯學士時有以司馬溫公像求涯翁贊者翁遂命與謙代作其中  
有拔茅連茹公之在朝青苗變法公之在野  
公之再起是為元祐公之云亡是為靖康等語  
翁大加稱賞呂為數語該括宋家治亂殆盡為  
之延譽于謝方石諸公謂有倫魁之才已而禮  
闈廷對果占首選

### 董湛見知楓山

董中峯少宰湛甘泉宗伯卒業南雍時楓山章公懋任大司成試知其才亟加稱賞曰二子如同科薦則一會元一第二如二科薦則皆會元也弘治乙丑二公禮闈高選楓山言驗矣

### 中官黃賜讞獄

國朝凡三法司讞獄必命司禮中貴一人主之意必正統以后之因襲也成化間黃賜嘗膺此命時陸公瑜為司寇王恭毅公槩為廷尉二公名臣持論侃侃初不因黃有所低昂有兄與人爭第庇之因而致死者法司奏當以死黃欲從末減二公持不可黃大言曰同室之人聞者尚被髮纓冠而往救之况其兄乎正在矜疑之列二公無以應卒免死戍邊乃知宦官攬權必其才術有動人主非特左右承順而已

崔志端任大常

弘治間有崔志端者以黃冠至禮部尚書掌大常事翰林因有禮部七尚書一員黃老之語崔聞而憾之遂對以翰林十學士五箇白丁仕路之不清如此可嘆可嘆

薛之綱挽詩

李文達公賢在天順中稱賢相獨處羅倫一事不無可議時學士陳文者為之畫策后文死薛之綱御史作詩挽之曰學士先生早蓋棺薤歌聲裏路人歡填門客散名猶在負郭田多死亦安蓋井已非今日利氷山不似舊時寒九原若

見南陽李為道羅倫已復官時李已謝世而羅亦有脩撰之召矣

仁和擒虎詩

弘治間仁和尹居官頗不戢時獵者獲一虎士林中阿諛者從而賀之詩以為治效有士人俞珩者作口號嘲之曰虎告相公听我歌相公比我食人多相公若肯行仁政我自雙雙北渡河至今舉為口實

諷李西涯詩

李少師東陽自少小入詞林暨在館閣垂四十

余年正德中為首相有士人矚其亡投以尺素公歸啓之一絕云才名直與斗山齊伴食中書日已西回首湘江春草碧鷓鴣啼罷子規啼公得詩但解嘲而已

曲宴優人

嘉靖中遷庵閣老為首相一日

上曲宴群優作衣冠數輩會于庭曰吾輩未改官者也為之柰何或曰孔子聖人也盍往問及門見閔子騫告之故子騫曰何必改入室見孔子告之故孔子曰三年無改已而出遇宰予問

之具述以告宰我曰吾師吾友皆非也鑽燧改  
滿堂烘然雖有使之者然要亦非虛語也

### 朱御史劾蔣琮

弘治間中官蔣琮守備南京甚橫姜御史縮劾  
之被謫瀕行同僚祖餞之姜謂衆曰某不足惜  
朝廷紀綱不可壞耳朱御史息慨慷請以身當  
之已而疏上將獲罪臺中故事凡奏疏同官皆  
聯名初上疏時有徐御史者不欲與其列忿謂  
朱曰尔何以害我若有事豈但已也吁若人鄙  
哉其尸位也已

### 木齋贈五清詩

五清劉先生起廢為臺副督學兩浙木齋先生  
以與時忤謝政家居五清因按部謁之木齋為  
之延欵夜話贈以詩曰柴扉靜掩養殘生遠道  
風霜枉旆旌末俗何人敦古道舊交今日見高  
情經帷暫輟司風紀扑教爭誇得俊英秉燭相  
看坐忘寐病餘老眼更分明木齋以丙辰主禮  
闈試五清蓋其所得佳士云

### 陳太常脫畧

莆田陳音師召歷編修侍講太常卿經學淹貫

經指授者多取科第有氣節但脫畧世故一切不經意人皆能道之嘗一日心欲有所訪既而馬上呻吟沉寔僕隸不柰竟引馬歸至門音以為友人家入廳事見所懸畫曰酷似我家畫乃坐而候主人其夫人見其久不入出而觀之公訝曰尔何以亦在此耶又一日因考滿誤入戶部司務廳中坐部屬重其翰林也出肅揖之公徐曰列位皆考滿在此乎若此類更僕難數也

劉學士經筵

孝宗皇帝在位好親儒臣一日經筵劉學士機

進講責難于君謂之恭二句

上注听久之俯賜清問因辨析陳字之義劉倉卒進講語不逮意

上謂之曰此即敷陳王道之陳也群臣叩首謝又問何以不講末句答以不敢

上又曰何害善者可感善心惡者可懲逸志自今不必忌諱嗚呼英主不世出鼎湖尤去遠矣

郭參政忠節

倪文毅公行狀有曰雲南思疊梗化守臣議用兵司馬馬公䟽今中外民疲財困災異疊見何

以用兵且欲遣京朝官往諭之公言用兵之法  
不足示之有餘今公之言得無示弱于天下乎  
使思疊聞之或輕中國矣且京朝官諭之諭之  
不從則策窮矣不如姑遣藩臣有威望者以往  
彼當無不服不服再議之用兵未晚也于是衆  
皆從之予讀至此蓋每嘆馬公之失計倪公之  
得休而又恐藩臣往諭者之難其人及觀二泉  
公集則知其人乃叅議郭公緒也其言曰迤西  
有夷曰思疊越金沙江界據地若干里積二十  
年拒不受撫至辛酉歲益猖獗鎮巡合議以勅

請事下公卿議撫之便孝宗重用兵從之詔簡  
藩臬貞毅臣以往乃以君與按察曹副使玉同  
行旬餘抵金齒于是盧叅將和統軍距所據地  
二程許而次遣官持檄往者皆被番不服盧還  
軍至千厓遇君語其故且戒勿迫君曰吾受國  
恩報稱正在此如公言若臣節何昔蘇武入匈  
奴十九年尚得生還况此夷非匈奴比萬一不  
還亦分內事也或謂君曰蘇君以黑髮去髮白  
而還君今白矣將以黑還乎君正色不答是日  
曹有疾君單騎從數人行旬日至南甸岩突不

可騎乃斬荆徒步繩挽以登又旬日至一大澤  
戛都土官以象輿來君乘之上霧下沙晦淖迷  
躓而君行愈力又旬日至孟賴去金沙江僅二  
舍君芟以次手為檄遣官持過江諭以朝廷招  
徠之意夷人相顧驚曰中國官今亦至此乎即  
發夷兵率象馬數萬夜過江抵君所持長槊勁  
弩露機刃環之數重有譯者泣走報曰賊刻日  
且焚殺柰何久此君曰爾譯雖微者亦世受國  
恩不以死報乃為間耶因拔所佩劍指示曰明  
日我渡江敢復言者斬衆皆股慄君因賦詩見  
志思疊既見檄諭禍福明甚天聞君志決即遣  
其酋長數輩來請听令及饋土物供具君悉却  
去乃奉宣勅榜且與語太畧先叙其勞次伸其  
寬然后責其叛罪聞之皆俯伏泣下請歸侵地  
君曰此固聖天子意也宣言許之皆稽首稱萬  
壽歡聲動地因詰盧叅將先所使人出以歸君  
曹盧得君報馳至則已撤兵歸地受緬書矣是  
夏五月歸至會城鎮巡以狀聞詔與奏事者官  
一級餘功俟覈以錄僉謂君且有殊擢越三年  
君考六年績道陞四川叅政又一年正德丙寅

始以雲南功加俸一級丁卯君進表至京師請  
致仕去嗚呼世弗患無才惟患用之弗盡耳觀  
于此舉當國者于正人何如哉

侯都憲脫險

侯都憲位平溪衛人計偕上春官時于長遇風  
覆舟附一材木得不死垂一晝夜已昏絕氣僅  
屬時有朝覲典史艤舟于岸材木夜着典史舟  
典史使人救之探其懷得文引知其為舉子扶  
至舟中溫以火飲之湯良久始蘇遂為治裝貨  
其木得數緡又贖以私財明年登第識者蓋以

占其后福云

王考功奇事

王考功激初尹吉水考績過彭蠡湖是日風恬  
浪靜忽雲霧昏冥波濤泛湧舟楫傾危從吏于  
窻隙見一龍蜿蜒目光如炬時舟中有丹砂一  
罌王忽悟龍欲丹砂之語急命吏投罌于水俄  
頃風波頓息卒獲濟亦奇事也

國

同治  
庚午

